

欽定四庫全書

子部

續名醫類案卷二十五



北京中医药大学图书馆版权所有

欽定四庫全書

續名醫類案卷二十五

腹痛

錢塘魏之琇撰

周漢卿治永康人腹疾疝癰行鄉解衣視之氣衝起腹
間者二其大如臂刺其一若然鳴又刺其一亦如之
加以按摩疾遂愈

明史

薛立齋治一婦人小腹脹痛小水不利或胸乳作痛或

脇肋作脹或氣逆心忒薛以為肝火而血傷脾用四物柴胡青皮元胡索木香而愈

一婦人久患腹痛去瘀血方止而復大痛諸藥不納薛以脾胃之氣虛寒用參朮炮薑丸如黍每用數粒津嚥下後以二味濃煎漸呷而愈

通府張孟威云其妹小腹痛服附子理中湯附子服過八十餘枚此乃沈寒痼冷之甚不多有者

壬午仲冬金臺一男子患腹痛誤服乾薑理中丸即時

口鼻出血煩躁發狂入井而死

二條俱見薛案

龔子才治一婦人臍腹疼痛不省人事只一劑立止人

不知者云是心氣痛誤矣方用白芍五靈脂木通去

皮三味等分每服五錢水醋各半煎至七分去渣溫

服

此瘕痛也

李北川仲夏患腹痛吐瀉兩手足捫之則熱按之則冷

外假熱內真寒之證

其脉輕診則浮大重診則微細

外假熱內真寒之脉

此

陰寒之症也急服附子理中湯不應仍服至四劑而

愈

汪石山治大坑方細形瘦年三十餘忽病腹痛磊塊起

落如波浪然晝輕夜重

病在血分可知

醫用木香磨服及服

六君子湯皆不驗診其脉浮緩弦小重按似濇曰此

血病也前藥作氣治謬矣彼謂血則有形發時雖有

塊磊痛減則消而無迹非氣而何

此難亦不可少

蓋不知有

形者血積也無形者血滯也滯視積畧輕耳安得作

氣論耶若然則前藥胡為不驗遂用四物湯加三棱

蓬朮乳香沒藥服之其痛遂脫然

本傳

孫文垣治嚴印老長媳腹痛有小塊𧑕𧑕然腹覺冷甚
兩寸關皆滑數兩尺沈微此脾氣弱而飲食不消又
當秋令濕淫之候不痢亦瀉宜預防與白朮蒼朮茯苓
甘草白豆仁木香半夏陳皮澤瀉煎服其夜果瀉
一度次早又瀉一度小腹仍疼且裏急後重蓋其稟
賦素虛當補中兼消兼利白芍三錢桂心一錢甘草
人參茯苓澤瀉陳皮白朮各八分升麻葛根各六分

服後脉皆軟弱不滑。𩑦塊亦消。改以人參黃耆白朮
白芍各二錢。炙甘草陳皮澤瀉葛根柴胡茯苓各一
錢。調理而安。

張道南內人以飲食忤於氣。因腹痛不飲食五日矣。兩
寸關弦尺滑。孫曰。此上焦氣虛。下有鬱滯也。以薑黃
青皮為君。山查檳榔當歸杏仁烏藥枳殼為臣。柴胡
木香為佐。吳茱萸為使。服後氣稍順。然後用葱二斤
煎湯浴洗腰腹。即將熟葱擦摩。使氣通透。

鬱滯外
治法

洗

畢即安卧少頃其夜大便通先下皆黑硬結塊後皆
清水此積滯行而正氣虛也以建中湯加山查茯苓
澤瀉柴胡香附薑連調理而痊

李士材治一人鬱怒之餘胸腹脹痛先服消痰疎氣化
食之劑不效更以人參補之亦不效診之六脉弦而
數此內有鬱熱為寒涼飲食壅之而痛用黃連三錢
梔子一錢五分橘紅白豆蔻各二錢鉤藤木香各八
分官桂二錢加薑汁半鍾二劑痛止四劑後加乾薑

人參而霍然

焦太史當臍切痛作氣食療之無功李診之曰當臍者少陰腎之部位也況脉沈而弱與氣食何干非徒無益反害真元以八味丸料煎飲不十日而痊

胡京卿少腹作痛連於兩脇服疎肝之劑一月以來日甚一日李診之左關尺俱沈遲治以理中湯加吳茱萸一劑知十劑起矣

柴嶼青治廣撫諱蘇昌將赴瀋陽京兆任時伊嫂腹痛

吐酸日夜轉側呼號已治未求一診以決之其脉微
緊受寒所致並非危症何用驚惶若此蘇云昨服藥
後稍定以方就政并屬定方柴見前方係附子理中
湯頗合是症遂不另立

王海藏治姬提領因疾服涼劑數日遂病臍腹下大痛
幾至于死與薑附等劑雖稍甦痛不已隨本方內倍

白芍服之愈

綱目

陸肖愚治尤少溪年近六十性急多怒因食冷粽四枚

遂患腹痛并脇亦痛醫用平胃散加枳實黃連不效彼亦知某家潤字丸方以五錢分三服令一日內服之大便已瀉而痛仍未止謂通則不痛今通而仍痛藥力淺而積未盡也再以五錢令一日服之大便數十行皆清水而痛反增劇號叫不已飲食不進面色青脹勢極危陸脉之弦細沈弱右關弦而有力曰虛中有實消則元氣即脫補則腹痛尚劇因用理中湯料五錢配枳實五錢一日二劑始下堅積在許是夜痛

大減明日減枳實之半又二劑而腹痛全愈第脇間尚微痛去枳實加青皮吳茱萸數劑而痊後以調氣養榮湯理之

張三錫治一婦人腹痛而瀉口乾面時赤乃食積也與木香檳榔丸一服去硬物愈

一酒客每日腹痛瀉黃沫知積熱也投苓連厚朴炒梔子木通澤瀉赤苓二劑少可復以酒蒸大黃為丸酒下二錢丸三服遂不發

一婦人小腹塊痛醫作陰治投熱劑不應又作燥矢治者硝黃潤腸丸等藥屢用不減詢之七日前作寒起遂腹痛左三部皆絕小無力右寸關俱弦滑必起于外感內傷挾氣下早故食滯不下每痛則下黃水止作無時下傷津液故作渴遂以炒白芍茯苓保脾木香青皮疏氣炒山梔清塊中之火當歸潤燥陳皮甘草和中小水不利加澤瀉升麻車前二劑黃水雖少痛塊不減隨用葱豉熨法復投二劑二便大去而安

陳良甫治家提幹內人病心腹脹痛衆投木香檳榔大
腹白芍薑桂之類病益甚診之六脉弦緊而和不似
病脉但診時兩手如火以此知其熱也衆問治法曰
大凡心腹刺痛不可便作虛冷治之或曰非冷而何
熱即生風冷生氣是也曰不然難經云虛則痒實則
痛又仲景曰腹痛者桂枝加芍藥湯痛甚者桂枝加
大黃湯家云荆布素來質弱曰有可辨處遇痛時使
一婢按之若痛止是虛寒症也若按之轉甚手不可

近叫喚異常此是實熱無可疑者當用大柴胡湯治

之衆皆不許乃與責狀而投之八服愈

良方

朱丹溪治一婦人上腹大痛連及兩脇以香附末湯調而安

羅謙甫治副使覃郎中年四十九歲至正丙寅春病臍腹冷疼完穀不化足脘寒而逆皮膚不仁精神困弱診其脉沈細而微遂投以大熱甘辛之劑及灸氣海百壯三里二穴各三七壯陽輔各二七壯三日後以

葱熨灸瘡皆不發復灸前穴依前壯數亦不發十日
後瘡亦更不作膿瘡口皆乾癸丑歲予隨朝承應冬
屯于瓜忽都地面學針於竇子聲先生因詢穴腧曰
凡用針者氣不至而不效灸之亦不發大抵本氣空
虛不能作膿失其所養故也更加不慎邪氣加之病
必不退異日因語針科忽教授亦以為然戊辰春副
使除益州府判到任未幾時風疾半身麻木自汗惡
風妄喜笑又多健忘語言微澁醫以續命湯復發其

汗津液重竭其症愈甚因求醫還家日久神氣昏憤
形容羸瘦飲食無味便溺遺失扶而後起屢易醫藥
皆不能效因思內經云陽氣者若天與日失其所則
折壽而不彰今因此病而知子聲先生之言矣或曰
副使肥甘足于口輕暖足于體便令足于前所言無
不如意君言失其所養何也予曰汝言所養者正務
快于心精神耗散血氣空虛因致此疾靈樞云人年
十歲五藏始定血氣已通其氣在下故好走二十歲